



寒岳集

共
六
十
七

~ 16
2437
15



門和16
號2437
卷7-15

寒岡先生年譜卷之二

附錄

神道碑銘并序

申欽

宣祖大王卽位之六年 體遠就賢思致鴻豫庀碩之化
時則有寒岡鄭先生出膺聘 命中外傾嚮蓋不啻景
星慶雲之瑞世也 願先生不常仕多在丘園未能究其
用而逮廢朝初載夷滅同氣謀廢 慈殿姦臣李爾瞻
鄭造等縱史之舉一世淪於禽獸之域先生進封事先
後相繼言雖未售而天彝人紀之已絕而復續者實賴
焉未幾而先生卒越四年癸亥惟我 主上殿下應天順



寒岡先生年譜卷之二

人撥亂世而反之正首揭曠典 命禮官致祀太師議
贈太常議謚 贈吏曹判書謚文穆公崇儒重道之義
長第俱稱而先生之邃學敦行見於言為發於事業者
於是乎大彰明較著矣先生之門人李學士潤雨氏持
旅軒張公狀徵欽以神道之文欽讀而曰是惇史也是
足以侔高狀明矣不佞如欽雖未獲齒於函丈之列而景
仰軌躅非一日之積也則又安敢以短於觚墨辭而不
為之闡揚乎謹按先生諱述字道可寒岡其號也鄭氏
自出清州為大姓其上世有諱顛事高麗著勲烈贈上
將軍其後有曰章敬公諱璿有文行執守寔生諱憤重

大匡清河君寔生諱誦左諫議大夫贈清河府院君號
雪谷有節行文學寔生諱樞重大匡清原君贈左政丞
謚文簡公號圓齋疏斥辛朧坐貶朧誅召還事在麗史
寔生諱揔入本朝策開國勲封西原君謚文愨公號復
齋於先生為六代祖章敬以下至公皆有集行世高祖
曰沃卿司憲府執義曾祖曰胤曾鐵山郡守 贈吏曹判
書祖曰應祥司憲府監察 贈承政院左承旨承旨公學於
寒暄金先生金先生愛其志行歸以女承旨公遵寒暄
型範克樹庭訓考曰思中 贈吏曹判書妣曰李氏
贈貞夫人星洲望閔山花亭先生堅幹之外裔考曰煥

隱德不仕胚胎前光貯開休祥嘉靖癸卯生先生于星
之沙月里先生生有異質英睿秀發見者稱以神童七
八歲受大學論語通大義九歲遭判書公憂哀毀如成
人既孤而服判書公遺訓益篤委已於學手摹宣尼畫
像掛於壁上日必瞻拜以寓依歸之意稍長請學於吳
德溪健受易乾坤二卦以類而通無異夙慣嘗逆鄉解
不赴會舉遂棄科業以古聖賢自期待晨興夜寐講讀
不輟往尋退陶南冥兩先生執贄問業兩先生一見而
相契戊辰丁內艱萬曆癸酉薦拜禮賓寺叅奉乙亥拜
健元陵叅奉不就戊寅銓曹請叙六品連授司圃署

司圃宗簿寺主簿義興三嘉知禮縣監皆辭庚辰拜昌
寧縣監始赴召 宣祖引見問曰爾師李滉曹植乎且
問二人氣像學問先生對曰李滉德器宏厚踐履篤實
曹植器局峻整才氣豪邁曰論大學工程進言曰三綱
八條無非修己治人之方天德王道祇在謹獨立志與
有為為貴 宣祖嘉納之下車正業興學做家塾之制
四境設書齋置訓長日課教讀每月朔望行望闕禮就
鄉校會諸生討論春秋釋奠以至社稷城隍厲祭無不
躬蒞黌舍壇壝噲然一新行鄉飲鄉射養老禮一邑風
礪吏畏民懷治理流聞觀察使報政最辛巳以持平徵

昌民追思立生祠冬拜宗親府典簿儀賓都事 社稷
署令皆辭壬午拜軍資監判官移疾而去癸未拜江原
忠清兩道都事工刑戶三曹正郎皆辭甲申 宣祖特
授同福縣監及陞辭 賜對諮以治道先生敷對條暢
明剴 宣祖酬酢如響敦諭遣之之官設施如昌山時
乙酉 宣祖萃儒臣勸校經傳名曰校正廳先生與焉
拜工曹正郎掌樂院僉正復拜工曹先生再上章請解
職歸家校正上之政院請留秋竟解歸冬拜軍資僉正
古阜郡守丙戌春拜慶尚道都事皆辭秋拜咸安郡守
立教化以綱紀之修故斯文朴漢柱祠以視效法凡有

水旱必躬禱靡不驗應戊子謝病歸辛卯拜通川郡守
壬辰倭寇犯京師 大駕西狩先生倡義討賊傳檄列
郡召集精銳堵截賊路關北土兵附賊煽亂 宣祖母
兄河陵君阮於窮山中縊死先生聞而痛之設機捕賊
尋河陵屍手自斂之聞于行在所 宣祖傷感不已命
陞通政進拜江陵府使造器械廣屯田嚴訓練賑飢乏
雖丁搶攘衆務畢舉甲午八為同副承旨乙未陞右副
左副諱適拜上護軍俄轉判決事右承旨丙申拜江原
道觀察使築鵝原山城為關東堡障冬適拜副護軍刑
曹叅議丁酉歷右副承旨護軍判決事除成川府使時

大駕還朝諸宮王子侍衛諸臣尚在府先生禮接上
下動遵規繩戊戌命躋嘉善庚子瓜滿拜護軍夏
懿仁王后薨先生奔赴除副摠管上疏論山陵事拜刑
曹叅判觀象監提調辛丑迺拜司正寧越郡守未赴留
為校正廳官壬寅拜忠州牧使又被召於校正拜護軍
癸卯拜洪州牧使甲辰拜工曹叅判乙巳拜海州牧使
丙午拜光州牧使俱不赴丁未春拜安東府使引國典
六十五歲不得為守令之法辭之宣祖不許至府有
一寺奴托權相家橫恣先生鞫治不撓冬迺戊申春
宣祖昇遐光海踐阼聞先生名特拜大司憲兼世子輔

養官宣祖寢疾經年姦孽釀亂倡俑飛箝鄭仁弘封
疏繼入以臨海君為注大行在殯逮捕株連三司請
置臨海于法先生連章救之縷縷數百言略曰先王
末命耿耿在耳殿下同氣之中與之同胎者祗有臨海
先嬪早世兄弟二人零丁同長殿下至懷有所不忍獄
不必盡究人不必盡問罪不必盡覈法不必盡施寧有
不經之失而臨海蒙不死之貸則文帝之尺布斗粟無
復謠於今日矣乞免者四乃迺禮部以國喪儀節來問
先生以朱子定論答之夏拜刑曹叅判時人目先生為
護送累辭乞罷癸丑夏朴堅應犀承姦臣風旨上變起

大獄辭連永昌大君上誣 慈殿先生封疏極陳周景
王時倭夫事據春秋三傳證之以救大君又曰父子大
息與天無極母子至情所當自盡深思古聖賢蒸蒸之
義謂天下無不是底而無變於前日之所以事之者焉
何必異宮別處有若不能無間者哉言甚切直疏將上
先生之子樟在都下恐先生獲罪止之先生聞之更為
封事並進前疏暨丁巳冬朝廷廢 慈殿之議已成先
生復草疏會聞光海有鄭述首倡全懸掠取羨名之言
不果進庚申正月寢疾終於泗上之持敬齋享年七十
八其前歲伽伽山崩卒之朝泗上木稼人謂之徵四月

己酉葬于星之南蒼坪山艮坐之原先塋之東也會葬
者四百六十餘人癸亥州之士子請於觀察使聞于朝
從祀川谷書院川谷乃退陶先生所定享程朱所而先
生修白鹿洞規與諸生講論處也先生配曰李氏訓鍊
奉事樹之女溫惠淑慎克內相先先生卒生一男三女
男曰樟全羅都事女長姜縝弘文校理次盧勝奉事次
洪燦府使都事娶都事曹光益女生三男一女男長惟
熙性孝服先生喪過哀致天次惟熟惟燾女適盧增姜
有一男曰有徵生貧盧有一男曰亨遇洪有一女未行
先生生質之美固自秀異而早登退陶之門聞淵源之

學且游於南冥大谷間淬礪其志氣知俗學之汨人才
性未嘗安於小成必欲致極乎高明廣大之域尊信小
學心經近思錄等書上泝鄒魯旁通濂洛閩閩稽思實
踐養深積厚動靜百為皆可宗師晨興盥櫛先拜家廟
退處書室几案必正語默有節起居有度雖居幽闇不
見惰容閨庭內外穆穆斬斬其事母夫人先意承志致
養無方友愛出天伯氏早歿仲氏出繼先生權攝宗事
虔誠不怠奉養寡嫂嫁遣二女撫愛姪甥無間已出與
人交際愈久愈敬嘉事幽問禮無不至自奉甚薄衣取
殺體食取克腹人所不堪處之裕如立乎位著惟義與

此嘗曰人臣事君猶子事父凡有所陳不可徒尚直截
唯當開悟上心使國賴其慶民蒙其澤其在銀臺入侍
經筵 宣祖方講易傳問于公曰程傳本義何先先生
對曰易之為道惟明乎消息盈虛之理進退存亡之機
不失乎時中而已若徒以占候為事則未矣當以程傳
為先又問朱晦庵遇遯焚稿曰此疏若入宋其庶幾而
反遇遯卦占筮之道不可謂天下之至神而朱子之必
決於此何也先生對曰若使宋寧宗一見封事便黜侂
冑則其筮必不遇遯此占筮之所以至神也出寧州縣
及按方岳經理區畫皆有經據謹守三尺綱條精密在

先生固餘事也見世教壞夷以為天叙天秩在乎威儀禮義之中古人制行方冊俱存可考而知不然何以有所立而持循哉遂指經傳參以時宜吉凶器服若遵豆罍爵方牀鞞軸深衣欄衽袞麻冠經莫不依古制用之遠近從化朝野取則與鄉人為講契約法會儀悉倣呂氏鄉約月朔講習願學之徒執經請業溢於門巷卿士大夫老師宿儒講學論禮者尺牘相屬而先生剖析精切決闕通微無不翕然而去鄭仁弘初與先生同遊學先生惡其偏執已見曰得志必誤國其老也詆訾先賢謀危國母先生絕之乃後仁弘以與甬瞻同惡坐法

誅時人方服先生之見當其盛年抱負甚大宇宙間事無不以為己責如啓蒙象數洪範九疇天文地志兵機律曆叅同悟真歧黃諸藝俱曉源委逮乎末年專意講述為文章一宗晦庵平正醇實不事浮華藻麗為工也雅好山水遇會心處有風零詠歸之興頭流楓岳異境名區窮搜極探以資養性卜築於檜淵蒔梅竹號百梅園避地武屹山中樂其泉石若將終焉又卜於蘆谷泗陽等地門徒之嚮往先生者為構精舍以迎之有康節行窩之風嗚呼四賢出而正學明矣其折衷而集成之者惟退陶李先生為然先生見而知之得其單傳以朱

夫子為模範以李先生為指南蘊蓄既宏充養又深庶
幾乎成已成物挽回世道而庶職州縣曷得以大施哉
戊申以後晦塞已極先生之免於辜幸矣先生之前後
疏章扶植綱常千百載之下迄國祚於無疆若先生者
其亦關世運之盛衰者非耶黃道重明白日宣朗人皆
知先生之道為可以矜式焉亦可謂天定也夫世之所
謂儒者高者偏於一節下者淪於卑近其克用力於全
體大用能有衛道之功者先生而已先生所述有聖賢
風範中和集說心經發揮濼洛羹牆錄五先生禮說古
今忠謨歷代紀年卧龍志谷山洞庵志樂天閑適朱子

詩分類古今人物志古今名宦錄古文會粹玉服泥革
圖深衣制度景賢續錄儒先續錄藏于家銘曰

惟帝降衷民受其中性無不善聖允攸同繫彼夸毗
欲混利糶曰惟先生挺生南服學傳家世道承淵源
明我明德肥遯山樊旋帛厚招異數便蕃延登前席
討論天人製錦百里化洽陽春出節入臺秋肅霜後
卷而懷之深潛理窟以禮為教天叙天秩大帶深衣
回琴點瑟浮雲萬變其樂囂囂晚際時屯盡言危朝
嶽立千仞卓哉嶢嶢扶持人紀日星冥途木稼山崩
吾道其孤 聖作物覩節惠崇終文不墜地孰躡高

殿有來式之若堂之封

教書

宣廟朝

王若曰殿方隅以扞王室任既重於蕃宣統列邑而撫黎元責莫大於宅牧在治平其猶難慎遇艱危寧忽簡求念茲江原一方僻在青丘東面內作畿輔之襟帶外控嶺南之咽喉地瘠民貧自昔撫摩之不易財殫軍耗于今康濟之實難東西六州剗於兵火而完城有幾首尾數百里存以飢疫而遺黎罕存烟火絕於千村榛莽遍於四境况加以不得已之徵發而重有無所聊之怨咨錙銖舉出於民膏繹騷寧間於他路時危有甚於累

卵弊瘼孰去乎如毛捩刃均為殺人予懷如割於民隱瀆翰要以衛國廟筭尤急於閭憂必用真儒斯無敵矣不有君子其能國乎惟卿學本於明道正義志存乎後樂先憂任銅符字牧之有年久著惟良之望掌銀臺喉舌者二載咸稱克允之才予簡曾定於錄屏僉舉又屬於謔岳忠義既篤夫豈擇事而安疆場未寧則或以外為重茲授卿以本道觀察使兼兵馬水軍節度使巡察使申以冊命畀之閭旋來旬來宣先務德義之廣布爰咨爰度勿歎王事之獨賢周九采之為職匪輕漢六條之問事宜審兵務精不教則棄所貴採鍊之日勤食乃

足斯為民天惟當積儲之母緩察事明而發令慎臨下
簡而律已嚴活顛連無告之氓亟施煦濡之澤去貪墨
肆虐之吏永戢誅求之風保民斯為急焉寧邦豈在他
也自餘臨機相時之籌畫只在好謀善慮之如何官通
政罪大辟稟予可裁凡係於軍律者任卿自斷於戲棟
賢分憂盱食方勤於東顧承流宣化甘棠宜繼於南詩
故茲教示想宜知悉

諭書

光海朝

聞卿解職之日拂袖南歸其介有若不埃終日者予甚缺
然如失左右卿自少志學踐履甚篤白首林下克養有

素昔在先朝久居近密贊襄弘多予固聞之夙矣乃
於嗣服之初擢長憲府蓋欲展布所蘊共濟艱難而卿
以疾苦辭章累上而不知休予念卿年高多病若一切
宰拒則恐乖於優賢之道茲許姑解職務以便調攝初
不料卿遽棄予而去也君臣之間情意藹然予之體卿
者若是其切而何卿之不體予意若是其忽耶靜言思
之只增愧怍矧今予一人不吊于天榮榮在疚未堪家
多難世子亦年尚幼冲輔養日急方將置卿於經幄書
筵委以啓沃輔道之任此心耿耿不啻飢渴而卿之去
適當此時無乃以予為不足與輔而有是勇退之計耶

予一人雖不足與輔獨不念世子輔養之重耶 先王在天之靈其有望於卿者必不少卿可忍負之耶 柱宮在殯上下遑遑卿不可以一向引退為義願卿追思我 先王無弃予一人幡然復路乘駟上來以副予翹企之望

又

聞卿不來良用缺然昔疾今愈無所嫌於出吊故古人行之不疑况來會 先王之葬仍輔寡昧之政乎卿其調理乘駟上來以副予望

寒岡先生年譜卷之二

